

# TEZAU LITURGIC

## 25 DECEMBRIE

# ACATISTUL NAȘTERII DOMNULUI I



MOSCOVA, 2000



# Акафист

## Рождеству Христову

---

### Конда́к 1

Избра́вый от все́х родо́в пречи́стейшую А́нгел Де́ву, и от нея́ роди́выйся плоти́ю Христé Бо́же на́ш; благода́рственная прино́сим ти раби́ Твои́ Влады́ко. Ты́ же я́ко имéяй милосéрдие неизрече́нное, от вся́ких на́с бе́д свободи́, зову́щих: Иису́се, Сы́не Бо́жий, воплоти́выйся на́с ра́ди, сла́ва Тебе́.

### И́кос 1

А́нгел мно́жество собра́ся в Вифле́еме, ви́дети непости́жное Рожде́ство; и ви́девше своего́ Творца́, во я́слех я́ко младе́нца лежа́ща, удиви́шася! И стра́хом благогове́юще, Ро́ждшагося и Ро́ждшую боголе́пне почита́ху, пою́ще такова́я:

Сла́ва Тебе́, Сы́не Бо́жий, прéжде вéк от Отца́ ро́ждённый; сла́ва Тебе́, со Отце́м и Ду́хом вся сотвори́вый.

Сла́ва Тебе́, спасти́ поги́бшия пришéдый; сла́ва Тебе́, да́же до ра́биа зра́ка снизше́дый.

Сла́ва Тебе́, Взыска́телю заблуждших; сла́ва Тебе́, Спаси́телю погибших.

Сла́ва Тебе́, средосте́ние вражды́ разруши́вшу; сла́ва Тебе́, рай, преслуша́нием затворе́нный, па́ки отве́рзшу.

Сла́ва Тебе́, ро́д челове́ческий неизрече́нно возлюбив́шу; сла́ва Тебе́, на земли́ верте́п Не́бо явив́шу.

Сла́ва Тебе́, ро́ждшую Тя́ Де́ву, Престо́л херувимский показа́вшу.

Иису́се, Сы́не Бо́жий, воплоти́выйся на́с ра́ди, сла́ва Тебе́.

## **Конда́к 2**

Ви́дяще безплот́нии А́нгели своего́ Влады́ку, от Чи́стыя Де́вы плоть прие́мша, ужасо́шася! И дру́г ко дру́гу ре́ша: пресла́вное сие́ Та́инство непости́жимо на́м явля́ется бы́ти: оба́че дивя́щеся неизрече́нному того́ снизхожде́нию, со стра́хом поя́ху: Аллилу́иа.

## **И́кос 2**

Разу́мная вся́ тва́рь ужаса́ющися и благода́рящи поёт Твоего́ Рожде́ства Влады́ко та́инство! Си́лы небе́сныя ра́дуются пою́ще: сла́ва в вы́шних

Бо́гу, и земля́ с челове́ки веселі́тся, мы́ же  
непреста́нно вопи́ем:

Сла́ва Тебе́, в вы́шних сла́вимо́му Бо́гу; сла́ва  
Тебе́, ми́р на землі́ сотвори́вшему.

Сла́ва Тебе́, нас Со́бою примири́вшему; сла́ва  
Тебе́, на землі́ на́м яви́вшемуся.

Сла́ва Тебе́, от Де́вы неизрече́нно  
воплоти́вшемуся; сла́ва Тебе́, звезду́  
возсия́вшему.

Сла́ва Тебе́, то́ю волхвы́ на поклонё́ние Тебе́  
призва́вшему; сла́ва Тебе́, да́ры от них  
ми́лостивно прия́вшему.

Сла́ва Тебе́, всю́ тва́рь Тебе́ служи́ти  
научи́вшему; сла́ва Тебе́, и нас Тебе́ пе́ти  
наста́вившему.

Сла́ва Тебе́, Себе́ на́м соедини́вшему; сла́ва  
Тебе́, нас Со́бою спа́сшему.

Иису́се, Сы́не Бо́жий, воплоти́выйся на́с  
ра́ди, сла́ва Тебе́.

### **Конда́к 3**

Си́льный в крѣ́пости, Бо́г ми́ра, и Оте́ц щедро́т,  
прии́де на зе́млю, спасти́ ми́р погиба́ющий:  
Ны́не в Вифле́еме я́ко младе́нец ражда́ется от  
Де́вы: Ю́же Ма́терь и Хода́таицу спасе́ния

показа́, всѣмъ Того́ воплоще́ние сла́вящимъ и пою́щимъ: Аллилу́иа.

### И́кос 3

Иму́ще, Тебе́ пречи́сто ро́ждшую, о насъ непреста́нно моля́щуюся: ра́дующеся поѣмъ Твоего́ вочелове́чения Влады́ко Та́инство! И Рожде́ство от Дѣвы Богопріятны́я славосло́вяще вопи́емъ:

Сла́ва Тебе́, Сы́не Бо́жий, насъ ра́ди воплоти́выйся; сла́ва Тебе́, Сы́не Дѣвы, от Дѣвы несказа́нно роди́выйся.

Сла́ва Тебе́, человеколю́бія без́дну на насъ показа́вшему; сла́ва Тебе́, насъ неизрече́нно возлюбѣ́вшему.

Сла́ва Тебе́, заблуждшее овча́ взыска́вшему; сла́ва Тебе́, об о́бретении того́, сра́доватися А́нгеломъ ре́кшему.

Сла́ва Тебе́, на ра́мо сию́ восприе́мшему; сла́ва Тебе́, ко Отцу́ то́е приве́дшему.

Сла́ва Тебе́, челове́ки со А́нгелы во еди́но ста́до совоку́пльшему; сла́ва Тебе́, ми́р от прѣлести изба́вльшему.

Сла́ва Тебе́, вели́кую и неизрече́нную ми́лость  
на́м яви́вшему. Сла́ва Тебе́, на́с па́че все́х тва́рей  
просла́вльшему.

Иису́се, Сы́не Бо́жий, вопло́тыйся на́с  
ра́ди, сла́ва Тебе́.

#### **Конда́к 4**

Бу́рю вну́тръ помышле́ний сумни́тельных пре́жде  
име́вый целому́дренный Ио́сиф ны́не вну́тръ  
Божество́ннаго верте́па ви́дит пресла́вныя. А́ще  
бо и я́ко челове́ка ви́дяще от Де́вы ражда́емаго,  
но разумева́ше от веще́й Бо́га бы́ти и́стиннаго:  
те́м и боголе́пне поклони́вся, ра́достно поя́ше:  
Аллилу́иа.

#### **И́кос 4**

Слы́шаша па́стырие А́нгела, возвеща́юща им  
ро́ждшагося Спа́са ми́ру, во гра́де Дави́дове: и  
ско́ро те́кше, ви́деша Сего́ я́ко а́гнца непоро́чна,  
во чре́ве Де́выя упас́шася во я́слех лежа́ща, и  
Ро́ждшую благоговейно́ служа́щу и Ио́сифа со  
стра́хом предстоя́ща; сказа́ша о глаго́ланных к  
ни́м, и поклони́вшеся Ро́ждшемуся, ре́ша:

Сла́ва Тебе́, А́гнче Бо́жий Спа́се ми́ра; сла́ва  
Тебе́, Сы́не Бо́жий, неизрече́нное чу́до на́м  
показа́вый.

Сла́ва Тебе́, а́нгельских пе́ний слы́шатели на́с  
бы́ти яви́вый; сла́ва Тебе́, с ни́ми и на́с  
славосло́вити Тя́ научи́вый.

Сла́ва Тебе́, А́нгелы и челове́ки пе́ти Тя́  
вразуми́вый; сла́ва Тебе́, на землі́ и на небеси́  
ра́дость сотвори́вый.

Сла́ва Тебе́, я́ко о Тебе́ небесна́я сра́дуются  
земны́м; сла́ва Тебе́, я́ко Тобо́ю земна́я  
совокупа́ются небесны́м.

Сла́ва Тебе́, кре́пость диа́волю не́мощну  
показа́вшему; сла́ва Тебе́, от того́ мучи́тельства  
на́с изба́вльшему.

Сла́ва Тебе́, в Тя́ ве́рующим неизрече́нная  
ра́досте; сла́ва Тебе́, любя́щим Тя́  
неизглаго́ланная сла́досте.

Иису́се, Сы́не Бо́жий, воплоти́выйся на́с  
ра́ди, сла́ва Тебе́.

### **Конда́к 5**

Боготе́чную звезду́, Христо́во Рожде́ство  
предъявля́ющую, узре́вше звездоблюсти́тели  
волсви́; и тоя́ вождéнием, Непостижи́мага  
достиго́ша и Невидимаго ви́деша:  
возра́довашася же Тому́ вопи́юще: Аллилу́иа.



## И́кос 5

Ви́дяще ца́рие перси́дстии, на ру́ку Деви́чу,  
Ца́ря ца́рствующих, я́ко на престо́ле  
херуви́мстем се́дяща, и Вла́дыку то́го  
разумева́юще, а́ще ра́бий при́ят зра́к,  
потща́шася да́ры Е́му прине́сти: зла́то, я́ко Ца́рю  
все́х; лива́н же я́ко Бо́гу; сми́рну, я́ко  
Безсме́ртному, и поклони́вшеся по́яху:

Сла́ва Тебе́, Све́т все́м возсия́вый; сла́ва Тебе́,  
на́с звездо́ю на покло́нение Тебе́ призва́вый.

Сла́ва Тебе́, зло́бу лю́таго И́рода обли́чившему;  
сла́ва Тебе́, су́етно то́го умы́шление  
показа́вшему.

Сла́ва Тебе́, на́с от то́го преле́сти  
изба́вльшему; сла́ва Тебе́, покланя́тися Тебе́,  
Со́лнцу пра́вды, научи́вшему.

Сла́ва Тебе́, вся́ све́том ра́зума  
просвети́вшему; сла́ва Тебе́, Твои́м Рожде́ством  
многобо́жия преле́сть упраздни́вшему.

Сла́ва Тебе́, вра́жие вла́дычество до ко́нца  
низложи́вшему; сла́ва Тебе́, со Отце́м и Ду́хом  
Тебе́ покланя́тися на́с научи́вшему.

Сла́ва Тебе́, прельсти́вшаго нас зми́я главу́ сокруши́вшему; сла́ва Тебе́, от вѣчны́я сме́рти нас изба́вльшему.

Иису́се, Сы́не Бо́жий, вопло́тыйся нас ра́ди, сла́ва тебе́.

### **Конда́к 6**

Пропове́дник богоно́сных веща́ния яже от Тебе́ исполня́я, на земли́ яви́л еси́ Себе́, Спа́се, во убо́зем ны́не верте́пе ро́ждся от Чи́стыя Де́вы: и богáт сый, нас ра́ди обнища́л еси́ воле́ю, да челове́ки обогати́ши, ве́рою Тебе́ пою́щия: Аллилу́иа.

### **И́кос 6**

Воссия́л еси́ от Де́вы, и неискусому́жныя Твоея́ Ма́тере, Иису́се, я́ко со́лнце просвеща́я и прогоня́я лжи́ тьму́: де́мони бо, Спа́се, нетерпя́ще Твоея́ кре́пости, вси́ вострепета́ша, и а́д, ви́дев чу́до, убоя́ся: мы́ же благода́ряще вопие́м Ти́:

Сла́ва Тебе́, челове́к Спаси́телю; сла́ва Тебе́, бесо́в Потреби́телю.

Сла́ва Тебе́, преле́сти нача́льника Твои́м Рожде́ством устраши́вшему; сла́ва Тебе́, идо́льскую преле́сть упраздни́вшему.

Сла́ва Тебе́, свѣтомъ Богопозна́ния вся́  
осия́вшему; сла́ва Тебе́, тьму́ неведе́ния  
отгна́вшему.

Сла́ва Тебе́, Ка́меню, во́ду спасе́ния все́м  
источи́вый; сла́ва Тебе́, жа́жду Ада́мову и  
Дави́дову утоли́вый.

Сла́ва Тебе́, я́ко со́лнцем, Твои́м Рожде́ствомъ  
вся́ просвети́вшему; сла́ва Тебе́, лучи́ благода́ти  
вселѣ́нной облиста́вшему.

Сла́ва Тебе́, зе́млю обето́вания на́м  
показа́вшему; сла́ва Тебе́, от всеро́дныхъ кля́твы  
на́с Изба́вльшему.

Иису́се, Сы́не Бо́жий, воплоти́выйся на́с  
ра́ди, сла́ва тебе́.

### **Конда́к 7**

Хотя́ от ве́ка сокрове́нную та́йну на́м яви́ти, от  
всея́ тва́ри служи́тели та́инству показа́л еси́,  
Спа́се. От А́нгел Гаврии́ла, от челове́к Де́ву, от  
небе́с звезду́, от земли́ верте́п, в не́мже роди́тися  
благоволи́л еси́: те́мже дивя́щися твое́й  
неизрече́нной премудро́сти, зове́м: Аллилу́иа.

### **И́кос 7**

Но́вую показа́л еси́ тва́рь, явля́ся плоти́ю все́хъ  
Зижди́тель, из безсе́менныя прозя́б утробы́, и

сохранив ю, якоже бѣ нетлѣнну, и Ходатаицу спасѣнія показал еси поющим:

Слава Тебѣ, Сыне Божий, Тя рождшую Матерь милосердія показавый; слава Тебѣ, Тую и по Рождествѣ Дѣву сохранивый.

Слава Тебѣ, спасти Адама пришедшему; слава Тебѣ, слѣзы Евины утолившему.

Слава Тебѣ, вся спасти возжелавшему; слава тебѣ, Воскресѣнія образ облиставый.

Слава Тебѣ, грехов наших рукописаніе раздравшему; слава тебѣ, Собою смиренія образ нам показавый.

Слава Тебѣ, нас ради обнищавшему; слава Тебѣ, Твоею нищетою нас обогатившему.

Слава Тебѣ, одеждою спасѣнія нас одѣявшему; слава Тебѣ, Твоею любовью нас усладившему.

Иисусе, Сыне Божий, воплотивыйся нас ради, слава Тебѣ.

### **Кондак 8**

Странное и преславное Рождество Твое видевше, в вертепе совершающееся, устранимся суетнаго міра, ум на Божественная преложше. Сего бо ради Бог на земли явился смиренный

человѣ́к, да на Небеса́ возведѣ́тъ, Тому́ вопи́ющія: Аллилу́иа.

## И́кос 8

Вѣ́сь еси́ желáние, вѣ́сь слáдость любя́щим Тя́, Христѣ́ Бо́же, и Твое́ Божѣ́ственное снйзхождѣ́ние слáвлящим: от Дѣ́вы бо Чй́стыя рóждшся на землй́, нас на Небеса́ возвóдиши, пою́щих:

Слáва Тебѣ́, Сы́не Бóжий, на землй́ родй́выйся; слáва Тебѣ́, от Дѣ́вы неизречѣ́нно воплотй́выйся.

Слáва Тебѣ́, Себѣ́ нам показáвшу; слáва Тебѣ́, нас от Тебѣ́ далѣ́че сýщих призвáвшу.

Слáва Тебѣ́, неизречѣ́нная нáша Рáдосте; слáва Тебѣ́, серде́ц нáших слáдосте.

Слáва Тебѣ́, в Рождествѣ́ Твоёмъ свѣ́тъ спасѣ́ния возсйáвый; слáва Тебѣ́, слѣ́зы рáди нáшего спасѣ́ния пролйáвый.

Слáва Тебѣ́, тѣ́ми пла́мень страстѣ́й нáших угасй́вый; слáва Тебѣ́, нас от сквѣ́рны грехóвныя омы́вый.

Слáва Тебѣ́, преступлѣ́ние разрушй́вшему; слáва Тебѣ́, от тлѣ́ния нас избáвльшему.

Иисусе, Сыне Божий, воплотившись нас ради, слава Тебе.

### Кондак 9

Всякое разумение и всяк ум ангельский и человеческий не постигает Твоего непостижного Рождества Таинства разумети; обаче, Владыко Благий, нашу любовь и веру прими; и спаси нас, Тебе поющих: Аллилуиа.

### Икос 9

Ветия многовещанная, яко рыбы безгласная, видим о Твоем воплощении Владыко, недоумеют бо глаголати, како Бог сый совершен, человек совершенный явися, и от Девы неискусобрачная како родися; мы же Тайны не испытующе, верою единою славим Тя, вопиюще:

Слава Тебе, Ипостасная Божия Премудросте; слава Тебе, неизглаголанная всех Радосте.

Слава Тебе, любомудры немудрыя явивый; слава Тебе, о Тебе испытующих посрамивый.

Слава Тебе, вся баснотворная плетения растерзавый; слава Тебе, свет Боговедения всем возсиявый.

Сла́ва Тебе́, му́дрость во Твои́х де́лах  
проли́явшему; сла́ва Тебе́, мно́гим ра́зум  
просвети́вшему.

Сла́ва Тебе́, пу́ть спасе́ния на́м показавшему;  
сла́ва Тебе́, неизче́тная бе́дно милосе́рдия.

Сла́ва Тебе́, пучи́но щедро́т и человеколю́бия.

Иису́се, Сы́не Бо́жий, воплоти́выйся на́с  
ра́ди, сла́ва Тебе́.

### **Конда́к 10**

Спасти́ восхоте́в ми́р погиба́ющий, и́же все́х  
укра́ситель, от Де́вы, я́ко младе́нец ражда́ется и  
во я́слех пелена́ми повива́ется, разреша́я  
многоплетенны́я плени́цы прегреше́ний: И Сы́н  
сы́й Бо́жий, Де́выя Сы́н быва́ет! И вся́ му́дре  
устро́яет да спасе́т Тому́ пою́щия: Аллилу́иа.

### **И́кос 10**

Стена́ и сто́лп зло́бы богопроти́вныя И́род  
пребеззако́нный показа́ся, жи́знь все́м  
подаю́щаго уби́ти богобо́рец тща́шеся, и  
незло́бивыя младе́нцы, я́ко кла́сы незре́лы мече́м  
пожина́хуся: те́мже и мы́ злобу́ всякую́ от серде́ц  
на́ших отринувше, на́с спасти́ прише́дшаго  
просла́вим вопи́юще:

Сла́ва Тебе́, и́родово умышле́ние тща́тно  
показа́вый; сла́ва Тебе́, от того́ изби́енныя  
младенцы со А́нгелы сопричты́й.

Сла́ва Тебе́, зло́бы потреби́телю; сла́ва Тебе́,  
смирёния Нача́вниче и сме́ртных Люби́телю.

Сла́ва Тебе́, ро́г го́рдости сломив́шему; сла́ва  
Тебе́, све́т пра́вды все́м возсия́вшему.

Сла́ва Тебе́, крото́сти и смире́нию все́х собо́ю  
научи́вшему; сла́ва Тебе́, вся́ в Твое́ позна́ние  
приве́дшему.

Сла́ва Тебе́, Тя́ Ро́ждшия утробу́, Твои́м  
Рождество́м освяти́вый; сла́ва Тебе́, от па́стырей  
чу́до и от волхво́в да́ры прия́вый.

Сла́ва Тебе́, и безслове́сныя Тебе́ служи́ти  
научи́вый; сла́ва Тебе́, всю́ тва́рь освяти́вый.

Иису́се, Сы́не Бо́жий, воплоти́выйся на́с  
ра́ди, сла́ва Тебе́.

### **Конда́к 11**

Пе́ние вся́кое побежда́ется, Твоему́ е́же на́с ра́ди  
воплоще́нию, досто́йно прине́сти хотя́щих:  
те́мже и на́м удо́бее е́сть люби́ти молча́ние, и́бо  
а́ще и равночи́сленныя песка́ морска́го пе́сни  
прино́сим Ти́, Царю́ Пресвяты́й, ничто́же



соверша́ем досто́йно: те́мже со стра́хом поём:  
Аллилу́иа.

## И́кос 11

Свѣ́тъ Тя́ незаходи́мый, су́щии во тьме́ и се́ни  
смѣ́ртней сѣдя́щи, Спа́се на́ш, узре́вше от Дѣ́вы  
возсия́вша: просвети́шася огне́м Твоего́  
Божества́; и Тебе́ Прему́дрости и смы́сла  
Подате́лю пояху, сицевая́:

Сла́ва Тебе́, Сы́не Бо́жий, Свѣ́те  
неизрече́нный; сла́ва Тебе́, Со́лнце пра́вды,  
Твои́м Рожде́ствомъ вся́ просвети́вый.

Сла́ва Тебе́, многосвѣ́тлое просвеще́ние  
возсия́вшему; сла́ва Тебе́, многотеку́щую  
благода́ти реку́ на́м источи́вшему.

Сла́ва Тебе́, жа́ждущих водо́ю спасе́ния  
бога́тно напои́вшему; сла́ва Тебе́, любя́щим Тя́  
и́го бла́го и бре́мя Твое́ легко́ показавшему.

Сла́ва Тебе́, от бре́мене грехо́внаго на́с  
облегчи́вшему; сла́ва Тебе́, на́с от рабо́ты вра́жия  
изба́вльшему.

Сла́ва Тебе́, Твои́м на земли́ явлéниемъ вся́  
возвесели́вый; сла́ва Тебе́, утеша́тися на́м  
наде́ждею пакибы́тия дарова́вый.

Сла́ва Тебе́, на́м желáний на́ших кра́й Себе́ яви́вый; сла́ва Тебе́, на́с враго́в су́щих со Отце́м прими́ривый.

Иису́се, Сы́не Бо́жий, вопло́тыйся на́с ра́ди, сла́ва Тебе́.

### **Конда́к 12**

Благода́ть все́м подáти и долги́ челове́ков разреши́ти прише́дый, Спа́се на́ш, Твои́м Воплоще́нием: те́м и на́ша долги́ разреши́ и грехо́в рукописа́ние раздери́: Твое́ несказа́нное Рожде́ство сла́вящим и непреста́нно пою́щим: Аллилу́иа.

### **И́кос 12**

Пою́ще Твое́ вочелове́чение, хва́лим, благослови́м и покланя́емся Тебе́, Спа́се на́ш; и ве́руем, я́ко Госпо́дь и Бо́г еси́, спаса́яй все́х на Тя упова́ющих и Твое́ е́же от Де́вы неизрече́нное Рожде́ство славосло́вящих и пою́щих такова́я:

Сла́ва Тебе́, Сы́не Бо́жий, в вы́шних со Отце́м и Ду́хом покланя́емый; сла́ва Тебе́, от все́х коленъ небе́сных и земны́х сла́вимый.

Сла́ва Тебе́, сокрове́нное от ве́ка та́инство открыв́ый; сла́ва Тебе́, Твою́ к на́м неизрече́нную любо́вь яви́вый.

Сла́ва Тебе́, всея́ тва́ри Украси́телю; сла́ва Тебе́, на́м всеми́лостивый Спаси́телю.

Сла́ва Тебе́, благоче́стно ца́рствующи́х на земли́ ски́петры утвержда́яй; сла́ва Тебе́, святи́тели благоговейны́я и иере́и премудро́стию и благоле́пием украша́яй.

Сла́ва Тебе́, Це́ркве основа́ние и утвержде́ние; сла́ва Тебе́, все́м ве́рным спасе́ние и украше́ние.

Сла́ва Тебе́, теле́с на́ших Врачу́ и Исцеле́ние; сла́ва Тебе́, ду́ш на́ших Украси́телю и Спаси́телю.

Иису́се, Сы́не Бо́жий, воплоти́выйся на́с ра́ди, сла́ва Тебе́.

### **Конда́к 13**

О,Пресла́дкий и Всеще́дрый Иису́се, Спаси́телю на́ш, Тво́рче и Влады́ко! Приими́ ны́не ма́лое сие́ моле́бное благода́рение и славосло́вие на́ше, я́коже прия́л еси́ от волхво́в поклоне́ние и да́ры; и сохрани́ на́с, Твои́х рабо́в, от вся́кия напа́сти: и грехо́в прощ́ение да́руй; и ве́чныя му́ки изба́ви ве́рно сла́вящих Твое́, от чи́стыя Де́вы, Рожде́ство и вопи́ющих Ти́: Аллилу́иа.

Этот конда́к читается трижды, затем и́кос 1-й и конда́к 1-й.

### Моли́тва

Пребездначальное Нача́ло, Бо́же Святы́й и Ве́чный, и всея́ тва́ри Соде́телю! Кийми словесы́ возблагодарим и кийми пёсньми возвели́чим Твое́ нас ра́ди челове́к неизрече́нное снизхожде́ние, во́лею Божества́ Своего́ не отсту́плше, и не́др О́тчих не разлуча́ясь, Бо́г сын, я́ко челове́к, в верте́пе безсловеснем ны́не положи́лся еси́, Христе́ Бо́же наш! Кто́ испове́сть неизглаго́ланнаго сего́ та́инства вели́чие и пресла́внаго собы́тия та́инство: Сы́н Бо́жий – Сы́н Де́вы явля́ется, да свободи́т ми́р от кля́твы зако́нныя, и сы́ны греха́ и беззакония – ча́дами Бо́жиими, насле́дниками ве́чных бла́г соде́лает, – Себе́ же, я́ко же́ртву непоро́чную и всесвяту́ю, в зало́г спасе́ния па́дшаго челове́ка да принесе́т. Иису́се Сладча́йший, Влады́ко Всеми́лостивый! Твои́м Пребоже́ственным снизхожде́нием юдо́ль земна́я в хра́м Боже́ственных Сла́вы Твоея́ освяти́ся, и вси́ живу́щие на ней небе́сным весе́лием испо́лнишася. Сподоби́ убо и нас в де́нь пресла́внаго Рожде́ства Твоего́ чи́стым се́рдцем и отве́рстою душо́ю испове́дати Тя́ и́стиннаго А́гнца Бо́жия, улажда́ющего и

укрепляющаго нас надеждою грядущих благ в немеркнущем Свете Трисиятельнаго Божества, Имже вся живёт и движется, Имже обновленье нашего первообразнаго бытия да усовершится. Ей, Господи, всякаго благодеяния богатый Дателю, и Подателю Благий, за еже тако возлюбил еси мир, яко вся скорби и болезни наша на Себе понести изволил еси, не остави нас, дондеже суета земная скорбьми и напастьми не изсушила души наша, и не погибне путь спасения под ногами нашими, да не посмеются о нас врази наши, но даруй нам в свете Твоего Божественнаго Откровения познати путь мира, добра и истины, и воззови ненасытною жаждою по Тебе, Спасителе нашем, во еже творити волю Твою преблагую во страхе Твоём, и в похвалу неизречённому снисхождению Твоему, яко кадило благовонное, приносить Тебе житие нескверное и любовь нелицемерную, да в делах наших и во уповании веры нашея непрестанно совершается воля Твоя святая, и во веки не умолкнет под небесем слава Твоя, слава,— яко Единороднаго от Отца, исполнь благодати и истины. Яко о Тебе, ныне плотию от Безневестных и Пречистой Девы Марии Рождшемся, вся колена небесная и

земная, радости исполняющаяся, велегласно исповѣдуют: с нами Богъ, Ему́же чѣсть и поклонѣние подобаетъ – Отцу́ и Сыну и Святому́ Духу, во вѣки веко́в. Ами́нь.

